

清容居士集

二十一

清容居士集卷第二十九

墓誌銘

浦經歷墓誌銘

大德丙午梅與吳郡浦源如淵同佐史局
史局總翰林職清簡屬筆將既輒群坐感
否今古如淵呐不出口一日正襟瞪目援
酌是否纒纒數百語經史綜錯深切治道
且曰吾家君重然諾慷慨子歸且往見是
歲還吳始納謁焉見其設席尋丈車屨沓
戶限茗絕觴舉輒口數州郡靡敝事傾耳

點首皆僞寓達官竒其言將引以為他日
助未幾授漕運府知事朝貴人俾乘驛來
京師昌言漕計十數事不便朝從其言即
陞為經歷壬子歲梅留吳家久遂益得奉
議論痛言田稅民役上下交困之將繕治
其說於素所傾密者于時以婉語止之曰
害不什一除苟出苛擾殆將重病之君立
悟乃止後授黃州錄事判官延祐乙卯君
年六十一矣嘗謂知己多行事少平時措
念挺挺可表著迄莫能自見一有委使排

根扶蠹將欣然盡瘁方受檄推考而卒以疾至大故實四月庚午也嗚呼成周以三物教萬民降于司馬遷憤世嫉邪獨致意任俠君周於事物激不近刻任重致遠出戶而日昃噫幸歟其不幸歟浦為吳郡著姓君諱椿字 世家崑山州魯大父某大父某植德潛閔父某貧而好施君少試吏以曲直視事不肖有高下簡易絕城府解排紕微磊落輒自許壯歲耻同凡輩始辟漕運府史熟其利害府薦于 朝為照

磨三遷為府經歷晚授黃州而志意莫遂詎命也夫娶陳氏男五長源以編脩官授承事郎常熟州判官次厚與陳夫人先七歲卒次湜浩津女嫁同里嚴震孫男五孫女二六月乙酉葬長洲縣陳塹之原銘曰璞隱于荆彼士泣之驥伏于車曷予繫之成者匪天為者匪人不成不為其風肫肫聿昌其始有子文偉高丘永安是謂受祉司天管白焦君墓誌銘

長安焦氏世遠軼莫究宗譜有諱紹先者

金汰武時始著進士籍生子繼祖為河南
招討使招討生餘慶第詞賦科仕至中順
大夫雲陽縣令金將亡國勢感債日挈都
南徙達官重族棄播不自保雲陽號儒家
乃讀建除候占等書察便利生死法為隱
避計死未幾有子曰永字某益究術自秘
天兵下陝率里閭孥屬二百九人道金洋
入蜀門蜀附定悉完聚歸後家岐陽遂以
術顯靈臺因官焉至元庚辰靈臺卒年六
十有八男二榮陝西四川陰陽提舉顯廣

元路歸興倉使女一適輔某孫男四澤臨
洮府稅務大使澆將仕郎同知益良州事
渥岳州路陰陽教授沆延安路陰陽教授
其葬在咸寧縣龍首鄉南岡合配胡氏祔
大德丁未孫沆奉集賢宋公所為先瑩碑
與靈臺君之事狀謁某京師且曰吾祖不
顯于儒躬邁險艱食藪保緒晚歲聚經史
探玩意若有俟性溫重無忤色紛難急乏
力盡不瘁諸父兄斬然自持承芬振華挈
挈自厲匪我祖先德疇克有賴敢以是乞

銘銘曰
起儒維魯迺報以承魄藏止止昭爾孫子
俾復其始

滕縣尉徐君墓誌銘

君諱之綱字漢臣金以詞賦舉進士君為
詞賦大有能名會金將亡不得試作賦說
以示學者窮幽闡微合金宋體指摘昔人
鉅作截然不少讓上論隋唐曲盡幽眇久
而曰是果為學邪益按道理以河南二程
江南朱張胡蔡為根柢窮春秋易二經其

言春秋失始三傳左氏誣為甚常事不書
聖人之旨也易更三聖麻衣誠偽書夫子
十翼功並日月其言與朱文公合當是時
南北蓋未混也意識卓絕尚友於千載其
言論金士疑之宋號以儒立國論亦如君
言其所為書東齋默志三卷皆經說也通
融賦說三卷舉子學也麟臺雜著七卷其
所為詩文也

皇元略中原定地戊戌歲始招輯儒士君
以明經選益都于時李壇以諸侯兵分省

君以府學教授佐省事壇喜儒間問攻戰成敗陰蓄甲士習勞苦君講經曰使民以時相君不知也壇默然又曰平王威烈周之衰也戰國之士知諸侯而不尊周唐世河北將士尊藩鎮而不知有唐其言簡直遂黜為滕州滕縣尉讒者復以默志羅君禍後壇果就誅而君亦已下世中統四年八月某日也年七十有五配李氏郭氏嗚呼崎嶇兵塵士悉以童習自守磅礴河漢橫流塞而天源滾非君其誰邪淄川楊公

序其文矣君世家單州後徙濟州祖鐸父革俱金進士配翟氏子敬至元十三年中明經無祿即世孫天麟十七年亦中明經次鳳以積勞為益都路臨朐縣尹今承務郎慶元路總管府經歷次士龍代州儒學正曾孫若干人鳳靖共宜官愀然言曰祖父節行經學先哲推重子嘗為文字官顛誌墓道遂讀其所為書以叙乃為銘銘曰魯聖絕學蕪榛管曲說恣臆紛翩翻浮聲急響曼以繁青紫決拾靡覩顏夫子勇志

開冥頑手持寸膠清渾瀾雲陰駁霽白日
還佐鎮陳誼數斥姦拂衣避席彼構讒寥
寥道統孰異公正轍前趨南北貫厥功茂
著儒碩先遺文傳信銘永刊

龍興路司獄潘君墓誌銘

元貞元年梅掌呂成公麗澤祠于時壽俊
有數公能言乾道淳熙遺事嘗曰麗澤選
不輕二潘君真名士子繼二潘亦僅僅焉
大潘君吾里人以介直念世死小潘君弼
良輔處之麗水人介亦相近氣邁年盛用

世必得善譽子善識之未幾良輔來金華
望之魁偉壁立瞪目拱手廣席叅錯未始
出半語稍論古事輒躍然纒屬穿貫握手
曰大潘君死吾與子真交承矣後游京師
授贛州教授見中丞崔公議論剴發相感
動關絡解剔不為翕翕附中丞喜聞四方
利病即奏授廣東廉訪司管句架閣兼照
磨是後余亦入為太史屬臺使者苟午入
奏事咸言良輔有御史才廣東副元帥囊
橐峒寇稍廉察即縱寇搖動斂手弗敢問

遂悉發其姦蠲德慶路官逋糧三萬石劾
具幕長不法數事聞于臺立罷之監司欽
察公悉付以事副帥益鬱怒誘引止賴誣
讒會省臺停其職而以君劾罷者復所居
官未幾御史言論劾者罪著不宜復然君
卒以是去江南行臺御史列署薦君宜久
任憲職于時崔公已即世不復任君矣大
德十年復為贛州教授以昔之治廣者為
準闢田築宮訓士嚴整力請于官而復其
後皇慶二年授龍興路司獄不卑其職悉

疏宜行者以盡心焉部使者佟公憲府舊
屬命治佐創專利者凡得八百人悉除去
之會佟公去官不逞復以他事相誑誤強
訴者引君然君自是抑氣不能食以死嗟
夫士患不得名名與謗常角立昧昧後福
善不近名誠有為而言也若是者君幾近
之矣君族祖父曰叔豹曰杞世儒科皆至
二千石曾祖恕樂道不仕大父厚太學進
士脩職郎平江府吳江縣丞父應發薦于
鄉文行瑰偉士尊稱之君幼孤母項氏招

師教授俾植立其為文辭浩漑勢盛衝激
巖嶽風止瀾靜卒不露飄泊其善養氣者
與所為文號宜山集若干卷讀易管見四
卷詩一卷藏于家元配何氏子二人曰龍
吉鳳翔女三人長適常鑰次林定老徐天
祐再娶陸氏子二人鼎臣衡孫女一人適
林街三娶陳氏女二人尚幼曰昇日鑑皆
庶生孫男女各四人君卒於延祐 年七
月某日卒年五十有八梅在翰苑時嘗以
君薦于承旨程公程公曰吾固知之得無

以南士累乎相笑而止至治元年二月承
徵至 京師預考禮部進士策名得林定
老後登上第授奉化州同知定老踵門拜
且言曰潘君實婦翁先生嘗知之矣將以
今年八月庚申葬朱溪祖墓敢以銘請又
言婦翁嘗從先人先人卒定老生未周斲
斲撫字終以女妻之由是悲且歎曰師友
道喪久矣是尤宜書銘曰

長紳歲冠日出脂韋莫室其逢委蛇以嬉
白駒在谷不屑不辱決臆過都孰繫其足

生人匪艱成之實難九泥障流彼駛者繁
氣直以堅維德之完謂隘不由其名奚傳

江陵儒學教授岑君墓誌銘

慈溪黃宗御震之季子叔英彥實甫壻餘
姚岑氏咸言岑氏善擇壻彥實館其家以
詩書授子弟彬彬于子鉤深纂玄融液品
節各就條貫掉鞅於詞場者尤宜焉延祐
五年岑君良卿以詩義上禮部第二梅時
為殿試讀卷官定甲乙七年其第士貴
貢于鄉梅以至治元年再入集賢預校文

選詞賦工者擢前列登拆名則士貴也

國朝治定踰百年始立科舉江南行省有
三而襄郢東西淮之士亦隸南選三歲止
七十五人登名上于庭者三黜其二岑氏
連取之盛矣哉論德考實必推其前人士
貴懷牒南歸以其先府君之狀來請銘君
諱翔龍字雲起踰弱冠即起家為高節書
院長調和州教授又調江陵教授幼警敏
能文辭性慕高潔以禮自持植廢舉缺罔
有怠事鄉里稱孝謹事大府能使貴戚者

咸愛重之大德九年卒年四十有五吏部
教官格年踰五十始得入州教授州不滿
三十而接踵嘗數百人十五年始得授且
守缺近三四年遠至七八年故多不能食
祿而陞于路者非耆年則下世矣君以盛
年徧厯宜泣于民不得年以沒前佚後窒
若憾者未一紀兄子登進士又三年子
亦進士較其得失是則亦奚有憾焉也矣
娶王氏先九年卒子男五文仲朝瑞為伯
父後士貴今授某官季德盛楚材女一適

鄧范某至大元年葬於上林鄉台奧之原
古者銘藏于幽後揭於墓道懼人之弗先
見也禮生於人情弗忍焉耳矣乃表以銘
曰

蒼姬展親岑亭啟封棘陽專居傳漢益隆
矯矯舞陽佐運闡功後興儒碩錮禁以終
定籍會稽支居鹽官三相佐唐偉績彌刊
或鳴以詩載車和鑿降宋中微其譜實完
蹇兮在山不駛不僨卒達于川百折混混
孰導其先孰開其蘊肇者不居來者益振

執券獲酬雙璧是陳載考令德其馨網緼
我銘以昭益勵後人

河間清鹽使郝君墓誌銘

君諱從字從之霸州信安縣人壯歲秀整
植聲節與人交不為儉薄意極其急難里
人推德之至元十三年為河間清鹽使副
後陞正使治弗煩擾而政日以理始君從
弟彬弱冠事

裕宗後為工部尚書官寢顯從之曰吾郝
氏由大父宛平君多惠政後宜有顯者徵

在尚書吾仕宜已矣會得末疾息心斷家
事調佐寒暑力補治策杖閭里如平時踰
二十年嘗謂其子志善曰才能不如古人
擇今世賢公卿如古人者事之斯近之翕
共取貴艷非進身本也志善從太傅丞相
之子大夫游始為北郊署丞為監察御史
而君與世嗒然益若相遺者焉延祐五年
十月某日卒年七十有一噫士患不知命
逐日希影挈挈然不返若君能知止矣而
其弟叅大政罷歸閉門幾十年亦不出今

拜大司農郝氏之昌殆未易量也考諱德
仁妣李氏宛平縣君諱政以叅政贈資德
大夫尚書右丞追封薊國公謚康靖賈氏
薊國夫人配劉氏女二長適楊居義次適
集賢照磨李忠將以十有二月某日葬宛
平君墓左御史來乞銘銘曰

始竒終閱覲德日溫訓言衡門不華以尊
曄曄大椿灌膏培根弗利其身利其後昆

翰林學士承旨贈大司徒魯國王
文肅公墓誌銘

翰林承旨贈大司徒魯國王文肅公至大
三年六十有六薨京師假葬于城東隅至
治元年其孤翰林待制士熙始克奉柩以
某月某日葬東平祖塋瓠山之原士熙拜
且泣曰墓上碑則父友翰林學士陳公儼
屬比銘之矣今葬日薄知吾先公莫若子
幸誌其厯官行事納諸幽堂稍不敢辭為
之辭曰公諱構字宥堂年弱冠以詞賦入
鄉校賈文正公一見器偉之禮載以歸俾
教授其子遂來京師至元十一年授翰林

國史院編脩官由院中叙遷應奉脩撰陞
侍講進翰林學士訖承旨佐丞相府為司
直庶吏部禮部二郎中太常為少卿於臺
外江北淮東道提刑按察使副內治書侍
御史入省叅議中書省事復出守濟南公
之在翰林也辭命詔令多所譏述其家傳
于朝者曰

世祖皇帝謚冊追謚

太祖冊

武宗皇后冊於實錄預脩

世祖成宗兩皇帝定

武宗上尊號親享

太廟儀在太常考輯因革有叙其佐丞相
府剗剗蠹弊更始選士丞相齊魯公信從
之為治書時值桑菖擅中書政柄嫉方直
士檄公偕翰林承旨魯國文貞卜忽木公
覈究燕南錢穀約一月治辦公先事計畫
不以累魯公會桑菖誅乃得免其按淮西
不切切近名而吏亦不敢慢事治吏禮二
部無缺緩同列見公署事不復視成績以

行叅議府六年一時執政聽南士陳利便
搜括田賦時平章政事何公榮祖與公正
色不少讓推萌折貪卒俾其謀以寢始
天兵平宋詔徵賢能李學士槃同受旨
公至杭首言宋三館圖籍太常天章禮器
輿仗儀注當悉輦歸于朝董趙公文炳
從其言今宋寶錄正史藏史院由公以完
守濟南寬貧民官逋脩閔子祠復學田觴
詠自娛而訟益以簡承旨李公謙幼師之
遷應奉卒推以先始受命勤敏通博一時

鉅公皆屈己期獎後卒與相並史館辟署
止憲數十人今相躡清要皆門下士其為
文閉閣詠諷落筆纚屬不止於王言為尤
長臺閣故事資公始能奉行事乞戶部侍
郎桓如嚴父惇姻睦宗在中書迄不肖私
其親人益伏之同里陳公儼為孔顏益教
授年幾五十矣入徵拜監察御史未幾為
翰林直學士蓋公昔嘗薦之王愷年七十
為編脩官公請于朝以待制致其事資
厯循叙銓衡所宜守文字官陞擢詔旨具

在後為繼者緘口不薦一士視公誠可愧也公之系由瑯琊居東平自八世祖為宋司農卿守鄆因家焉魯祖瑀登金進士第官奉訓大夫滄州無棣令妣范氏祖鐸以公官承旨贈正奉大夫太常大卿妣杜氏臨沂郡夫人父公淵贈昭文館大學士資德大夫妣薛氏瑯琊郡夫人昭文當金之時有兄三人攜妻孥南徙昭文私自念王氏大墓盡族以行孰與守下車伏草莽兄呼其名第不復得後騎迫大慟以去昭文傭保自活迄今其墓厚德勃興於公見之矣娶薛氏魯國夫人是生士熙再娶許氏皆先卒晚歲得二子士點士然女一嫁薛晉士熙能文辭有聲將大用於世推薦賢之切王氏殆未艾也銘曰

德充智周世莫與儔士林之標獎士無方譽髦珪璋孰阮其遭文鳴盛世金石雜比厥聲四昭子也乞文戰兢紹聞嗚呼乎公之名益以高

磁州知州程君墓誌銘

程君諱翔字鵬舉以孝友聞于州里後其子若第官江南恂恂愉愉夙然異衣冠常流於是江南之士族咸取以為則嗟夫世降俗媮能竭力以養者有矣友于之乖君師之嚴不能以戶化若程君者發於良心成於身教是宜揭豐碑以昭示薄俗按其狀曰世家廣平大墓在城西南兵難譜軼獨記其父名約是生三子長即鵬舉仲曰翱仕至僉浙東廉訪司事叔曰翼吉州治中二季以官業表著皆君之教君綜家治

生服其勤勞俾弟悉意問學聚書延師靡密叢雜一不使亂意弟則曰匪我之能維吾兄之成其事父承接意指日侍食候可否或卻食即不敢食懷甘割鮮斥幼者避席以立佐治湯液時其寒燠卒能以上壽終既除喪謹上冢禮脩誠厲行分寸不使越繩墨鄉閭尊之昭文學士張公孔孫集賢學士劉公遜曰吾徒不能以卓行薦諸朝是誠有愧年七十有一卒於元貞二年正月七日葬某鄉娶張氏子四良弼良輔

良佑良佐君疾革呼諸子曰父死異財違古禮慎遵我訓若君者懿德斯脩而復以囑其子程氏之澤良未艾也良佑始仕在中書右司厯叅議府戶部宣徽院改授太常太祝出為鎮江常州推官浙東道宣慰司都元帥府都事甫解職以選守令授奉政大夫上都路興州知州孫十人孫女九人良佑來請銘君第之子良能松江府橫浦場司丞良士温州路永嘉場監運亦曰伯父事實將湮佚宜速銘以詔後君以推

恩贈奉政大夫磁州知州驍騎尉追封廣平縣子張氏追封廣平縣君銘曰惟民初生其仁眈眈摩盪恣情有度彝倫展也磁州執德養淳奉盈臨淵踧踖以遵陳饌在堂手函脆新候顏以趨厥容孔溫爰用則之施于家人濟濟雁行厥聲四聞永裕是嗣振于朝紳城南之塋有大維椿爰勵薄俗表茲堅珉

榮祿大夫大司徒特進饒國吳公
饒國夫人舒氏墓誌銘

至大三年

武宗皇帝廣孝錫類以翰林學士中順大夫致仕吳公克己特授榮祿大夫大司徒封饒國公妻舒氏饒國夫人夫婦同日受封其子玄德真人玄教嗣師全節歸饒州安仁縣下馬入里門奉制書跪堂上二老人卻立望闕拜命誠實軼前古延祐元年壽八十仁宗皇帝遵

先帝故事錫上尊文錦以尊顯之表署宅

里榮耀極致人子之崇侈其親者茲亦備矣玄教嗣師實開府大宗師張公留孫之大弟子延祐六年公與夫人壽八十有五五月丙辰公薨全節號泣不食得請于上倍道星馳以歸十有一月某日饒國夫人相繼即世嗚呼生榮死戚訖同以歸盛矣哉人子之事其親情至矣而養弗能以盡養足以盡而祿弗及者千萬焉貴極於王侯衰退之禮見於墓下則允通顯之事親者十無二三焉合唐宋譜胄幾七百年

具慶僅一二見吳氏之德胚胎磅礴是誠
有攸來矣喪禮莫嚴於儒者飾情表行哀
不足而溢於禮者多矣玄德力行而兼有
之茲難能也至治二年春全節泣且告曰
將以九月某日合葬于崇德鄉山田原願
述我先公先夫人之世系而銘之隧道有
碑翰林學士元公則為之矣古者墓而不
墳藏銘于幽懼世之久而弗知也視其姓
名有不忍人之心焉後之慮其親者則曰
立於墓人之見之者不忍矣何藏焉碑於

隧斯敬矣銘於墓斯仁矣謹按番陽吳氏
皆祖番君芮饒公曾祖岳祖夢旂父鑑追
封某官謚文靖妣陳氏追封饒國夫人公
字祥甫卑讓自持不善者避之善者從之
身貴矣禮鄉黨以和視後進煦然以獎誘
觴至益持重戒其子侍

帝左右母以我耄為往返夫人舒氏諱妙
真世儒族祖某父某公蚤事舅姑盡孝敬
晚歲主祭享親滌濯遇諱日淚涕滿頤睫
內閭姻黨咸儀則之高堂齊眉人以為福

德具備何憾焉子四詢承事郎誠蚤卒叔
即玄德君季全義女二嫁某官孫男五人
善集賢脩撰能文詞孫女若干曾孫男女
九人銘曰

抑抑吳伯植節秉仁毀形以逃克昌胤孫
傳國中圮是生番君得其民心徙王策勲
代有顯賢支庶日繁廟食演裔饒惟邁親
執經武夷源同派分是生饒公守謙以文
大盈彌虛黜驕鏡昏厥配氏舒廬江之蕃
相唐始興矢辭派騫楚吳犬牙譜牒是遵
德儀媿賢象服衿衿訓子以忠不私其門
顯晦偕老死生同根道以易傳德以簡尊
悼哉令宗乞顯

皇元

海陰陳處士墓誌銘

咸淳元二間吾里陳公肖孫以善政事驟
用由大理寺丞知嘉興輔郡未幾兼浙西
提點刑獄踰年兼度支郎官人謂且大用
矣會高郡山寇起罷歸不數月疾卒喪除
其子高伯候平章賈某子馬前平章入政

事堂謂宰屬曰陳肖孫一廉可取宜與致
仕恩官其子當上奏餘人勿得為例既授
將仕郎宋社亡不復可仕矣鄉人尊之為
海陰先生先生少歲力古學不屑事科舉
聚群經師說商略讐證下逮荀聞曲記遺
言懿行譜牒星曆之說皆手抄與梓本書
相竝薦於信行傾急解難道里寒暑不廢
其學深湛詳博尊聞傳信懼悟解者汨其
真嘗禁止之非其友不友既友矣必反覆
護衛不使有議之者友或叛去先生泊然

不為言人益服之梅先處州府君於朋友
義尤敦叙而先生行事亦相近故交好尤
善厚先府君即世時來城中愛撫彌厚嘗
曰汝父宜有後昔百受欺今詎使一無報
邪大德五年梅備翰苑屬後屢遷先生喜
溢眉睫曰吾所期誠不妄延祐六年二月
得微疾作書與常往來戒勿用浮屠事且
命梅誌其墓幸以故人子何敢辭先生字
貴白甫世居奉化之鷓鴣山卒時年七十
有七葬某鄉某原妣方氏封安人曾祖聰

謀妣孫氏祖師稷以度文明堂恩贈朝散
郎妣陸氏鄔氏追封安人娶樓氏子二人
紹廉紹庭孫二人先生仕不逢時學不展
用熙熙然以壽終於後人有徵可無銘以
俟銘曰
駕車康衢佐夔龍日昊之離命不逢寤言
弗告隱志充畬田瘁耕黍稷豐考覈琬琰
手澤功大椿養齡蔭寵獲靈璞久閔合鴻
濛是式是佀後當隆

處士黃仲正甫墓誌銘

清容居士集卷二十九

二二

嗚呼自聘舉之法疏人得以易售抱德藝
者羞之後法始密益不肖自進有薦之人
不盡識或曰彼士奚足取又或曰士若是
者衆使一取之將曳踵以至梅官翰林家
久故有若吾黃仲正甫之賢明經博聞卒
不能啟口以告于當路嗚呼今亡矣果使
無傳則誠有罪矣仲正事母孝居家無語
笑聲待弟姪不使有忤意持敬讓以禮宗
姻鄉黨長者洽之幼者慕之其學汪洋暢
整經以載道必考其精微幽顯之委折於

史辨疆理氏族制度官名之興廢苟搜博
徵曲而通確而明故為文辭纏屬不能以
窮將臻乎極而始底于用欲以名世者不
在仕進也有司三奉科舉令卒不應試而
嘗以其說授于其徒昔者聖賢憂道不行
於時由列國言之誠遇焉斯得矣今天下
一轍達而上者其說具在布衣焉以遺逸
舉進以秩祿忍縮在下不能有為仲正之
不屑者在是儒病通乎古而不知今昔之
在上位顯重名其行事執復謨後世甚者

竊高爵講說他方以鉤徵台仲正嘗勃然
不喜然竟不假以年則誠可哀也已仲正
諱叔雅父震宗正少鄉提舉浙東常平茶
鹽咸淳間號名二千石晚歲高遯以卒仲
正不仕繼志焉耳矣世居慶元慈溪縣鳴
鶴鄉曾祖世堯祖一鶚贈朝奉郎妣趙氏
配鄭氏司農寺主簿大澤之女子二人正
倫正倩今葬韋家奧之原延祐七年五月
二十二日卒年五十有四銘曰
闕觀稱貞舉世顯榮肥遯靡求孰為之升

君允矣恬寡奇激英求知者天卒韜智名
有年不脩莫究其成我銘孔哀以永厥聲

將作監主簿蔣公墓誌銘

朝奉大夫將作監主簿蔣公諱曉字堯臣
淳祐七年進士以至元二十四年卒年七
十有一葬奉化州長壽鄉郛奧之麓曾祖
梗朝奉郎通判台州贈中奉大夫祖如愚
朝請郎通判隆興府贈太中大夫曾祖妣
張氏楊氏伍氏贈令人祖妣諸葛氏贈安
人贈淑人考嶠文林郎池州貴溪縣丞贈

清容居士集卷二十九

五

朝奉大夫妣湯氏贈宜人既葬三十有六
年長子景先卒無子次子昭先次其先德
家譜來請曰蔣實望族七世昭穆皆鉅公
著銘罔缺軼我先人在時子以子孫禮見
且承學今子在太史非子銘其誰宜稱不
敢讓銘曰

蔣姓宗姬正亭漢侯居鄞發祥唐季是稠
厥孫評事清淨急施有嗣金紫益振以義
忠肅陳公謫明絕朋俾子允師連桂以登
曰高祖考宰邑孤高相京傳私卒忤以逃

是生台州繼以隆興倅貳有聲再世是繩
詵詵貴池丞邑退卑厥兄諫議職寧聞馳
愍弟有孤將授門功公謝弗受迄升南宮
試簿仙居復攝寧海卻妖節淳民靡匱貸
入理京獄直囚不刑按其隱姦大尹以驚
出色武進造易分水嚴盜獫狴台公顯治
摩磔羸頑請粟食賑楮帛賦繁直疏罷進
神存心祀學飾新象彼厖者叟祠祝泣想
爰倅于越撫民彌加計臣增輸牘諫戢譁
佐餉既終監舶滋溫香珠翠毳罔游于門

輯為成書以儆墨愾彼相嫉廉改司軌函
白璧齷緹卒罹其讒晚佐繕營國步日窘
整實食貧絕見喜愠少窺刑書復入詞學
記言博精灑墨清犖譜書庚申文紀甲子
視階郎中澤奏冢嗣歲行丁亥九月庚戌
飾巾辭終壽七十一厥嬪氏曹箋詩之曾
子曰景先無祿絕承有季昭先守儒俟徵
墓在州南先域接挹集藏于家厥帙為十
維公儀觀偉古動人前聞後訛拍掌剖陳
魏坐若尸不傾不破彼諂有徒正色以止

者舊川淪來者荒塞昭銘墓門以作後則

清容居士集卷第二十九

清容居士集卷第三十



墓誌銘 墓表 葬記 附

宣武將軍壽春副萬戶吳侯墓誌

銘

往者壽春為宿亳要衝犬牙相承城郭樓櫓移易無常所草舍殘缺狐兔出沒道途間築覆土窖以避妻子短兵迎接利不利不復計猶持農器治田壤惴惴求活歲率如是

清容居士集卷第三十

世祖皇帝以天兵取江南捨兩淮為寇後至元十一年冬渡江十二年平江東抵錢塘宋社告亡十三年兩淮爭奉地圖以降無鏃刃之費天下大定而淮始得為樂土矣當是時吳侯祐以壽春歸職方其子安民字惠卿侍父居顏行率部伍招輯潰卒控曹橋下獨松渡越江略定會稽台温三城南踰閩嶺拔莆田擒將李雄生俘其守臣而以功歸其父二大帥曰吳氏子宜第其戰多別有以賞勵乃署千夫長十四年父卒始襲爵佩金符為管軍總管鎮揚州

十八年大治兵伐日本拜疏請行授宣武將軍征東副萬戶領淮東西兵以先舟師抵其國八月颶風大作器械軍士沈溺物故徂破舟亂流以經海島高麗日本二國常不相能遇高麗邏人問所以載與還而先帝亦厭兵罷征矣二十年建黃華反奉命往討之至政和縣獲賊將度九峯嶺接戰益急得其偽署圖籍虜驍將以歸十有二月昧爽進軍平溪華盡死力拒砦赤巖山盡俘其噐甲族屬黃華始平廻鎮揚州

二十一年省治杭州從與俱其年鎮湖州路南潯明年調嘉興路海鹽未幾復還南潯又還鎮壽春二十四年詔領軍討交趾至黃州罷兵二十六年鍾世明叛江西吳太仲叛興國縣搏竒蹂虛率以底寧上功司勲輒卑退不欲言三十年移鎮和州大德四年七月某日即世年五十有七娶楊氏先卒子男若干人長繼武襲其爵葬于宣武侯之墓左曾祖某祖某妣某氏予嘗聞古名將垂老呐呐若不能言祕畫勇

略壯歲所施無留蘊閱成敗得失已盡醇
酒鍾鼓夫豈託焉以自完者與烏江馬君
某言吳侯知儒書後悟浮屠氏禪學充然
若有得其女弟亦能為禪人偈語是皆世
所鮮有者銘曰

維昔淮甸勁雄莫侔一夫當百鋌戈怒投
裹彼乾餼聿嚴盛秋養安懷惻芑桑靡謀
天錫

大帝神武興邦捨其喉襟投鞭浮江俘駕
擒驍百城春撞視彼彈丸後夫卒降桓桓

清容居士集卷二

三

吳侯效命奉職以其素能昭代著績褰裳
先登颺掠電激或乘其巖或躡其跡瞻彼
霍山雲流無蹤昔困于兵今黍芄芄繫
帝之功維民之逢侯之幽宮松柏茂直告
而孫子靡懈靡忒法其退謙恬靜以默我
思于淮作銘示刻

同知樂平州事許世茂墓誌銘

端平三年蜀破衣冠大姓順流下東南至
江陵十不存一二皆舟觸巖嶮瞬息以死
淳祐三年蜀益蹙避兵來南其物故與端

平無異宋主憫其流離悉擢列在位大者
輔政機備獻納外為閫臣郡將經術史學
四方取以為宗則宋既亡故國世臣益困
辱不自振淪胥泥塗非獨蜀士然也大德
七年擢備史屬選與虞忠肅公孫集交許
君松以湖廣掾上計京師詢其官簿則
顯謨閣學士給事中少保諱奕之曾孫中
奉大夫知紹熙府謚介節諱彪祖之孫奉
議郎通判涪州諱長源之子君字世茂懿
範世則珠貫而櫛比語四蜀事歷歷在指

掌清言雅儀筆札擅簡古卑讓耻與後進
較酒至醉愈恭不復作世俗語遂締與之
交至大元年授潭州榷茶副使再見之貌
益溫論事盡繩墨智圓氣完欲以政理自
表見故其為茶官也不務苛刻而課有贏
羨

仁宗皇帝立科舉以君考鄉試自喜曰吾
嘗貢于鄉黜浮培實宜以稱明詔是歲
君所貢士入南省號為得人延祐五年授
徽州路婺源州判官復與語輒愀然曰吾

家繇開慶初辭簡池寓南康墳墓井邑生
別踰五十年貧不能忘祿齷齪州縣弗得
以文墨顯吾何為哉其治婺源益自振剔
絕蔓探疑明以近民而盜跡不敢入境至
治二年見其神益清貌益癯舉酒屢酌却
雋永猶喜議當世事稍與翰林直學士曹
君元用子貞共署薦為湖廣提舉儒學思
以供其老集賢直學士鄧君文原善之亦
曰是舉誠不忝吾為江東分部使者嘗舉
其政事文學矣十一月授承直郎饒州路

同知樂平州事歲終得上氣疾正月甲午
終于邸舍年七十有二曾祖妣某氏祖妣
某氏妣某氏娶趙氏再娶陳氏子男若干
人女若干人孫男若干人始君居南康閉
門授徒以奉母右丞燕公公楠開營田司
知其賢取以為佐後遷行大司農益任之
掾湖廣省六七年能以儒術輔法令事明
理融無底滯固陋一時吏師尊禮之君始
生踰百日晝夜啼不止有僧祝其頂曰汝
為許氏子啼何為耶啼乃止未幾涪州下

世年八歲隨舅氏茶馬趙君寓江陵里有
灾能取涪州神主奉以逸稍長益自奮勵
諸老咸器偉故晚歲宦業雖不大顯而行
事有足稱者其喪歸以某月某日葬于某
原子昨踵門以廣信劉君光事狀泣曰願
請銘桐泣相向不復辭嘉定更元韓侂胄
誅解偽學禁先少師正獻公會大父樞密
越公相繼入著作庭給事中少保許公魏
科首班著善類肅穆天下傾動未幾少保
論外戚不合去今幾百二十年閱昔時題
名求其嗣續率皆漸盡銷鑠而桐與世茂
俱為曾孫相顧自保灰編墜簡證世德之
舊於世茂實有望今死矣雖欲勿哀其可
乎銘曰

蜀繇秦開踰千載底寧英光蜚聲山川耀
靈漢魏啓伐不假以兵唐宋踵規開門畫
迎錦楹繡墻夸浮日矜帝鑒地圖百神震
驚氈車轟轟金戈晶熒自西徂東舳舻貫
繩或沈于淵或疫以乘蹇蹇許公疑丞弗
登是生介節嬰彼孤城恂恂涪州弱息慎

承流離拮据守其書籬儒以飭身政以裕
名匪急於祿抗宗希成凡我士族藥范是
懲東南之區凜其春冰我思許君是用述
銘

任隱君墓誌銘

鄧甬東橫溪多郡宗故家楠之七世祖祥
符丞而下娶婦皆楊氏少保夫人曰申國
太保曰越國魯國太師曰齊國幾三百年
矣楊素為中外表歲時往還無虛日而甬
東任氏與楊姻婭亦十餘傳一日任氏子

清容居士集卷三

元善介予表兄楊仁之以其先君子之狀
求銘復錄其十九世祖唐建州司馬遠之
葬記以示其記曰建州生佶檢校尚書工
部員外郎兼侍御史是生崇試循州司馬
循州生貞幹元和十三年補集賢殿供奉
承旨後為越州都督府功曹參軍以終集
賢生行規大中時以明經薦于鄉舉上第
為蘇州司兵參軍吾里士族莫先於樓素
楊蔣作郡志者於任有缺仕莫榮於集賢
承旨承旨布衣為者也職撰述校理在元

和時任不輕畀司兵以明經登唐上第尤
偉著志亦不紀考孫吳有任光任奕皆鄆
句章人今其地為鄆縣則建州蓋二賢之
裔而先賢皆遺軼比予補郡乘亦缺然有
愧矣嘗考大中以後鄆數為盜侵掠城燬
蕩遷徙錢氏以宗親專節鎮租稅刮剥民
不堪奉昔時故族躡藉銷鑠於任氏槩可
見至宋受版圖興文儒鄆士在汴始盛渡
江以南雲滄川湧幾二百年而不幸數十
年詩書廢墜望塵執隸欲為任氏十九世

之傳不可得噫可勝嘆哉可勝道哉任君
名天祺字君瑞曾祖汝諒祖用康父逢龍
其居鄉善保衛徵調數起先事以備縣胥
不能高下友其弟天麟弟病酒死曰吾不
可使弟無後殯其喪俟我死必俱葬也大
德七年六月某日卒年五十有八未幾弟
婦顧氏亦卒以其遺言大德十一年十二
月丁酉奉柩與弟及婦俱葬于吳公山之
祖塋妻屠氏四子元善可善承弟後達善
兼善孫男四立道弘道鳴道原道孫女三

立道楊氏壻也銘曰
世胄日顛任譜完堂堂文藝志錄傳昔通
今晦理則然鄉井急誼手可捐金歲東聳
下泓泉蹇極遇順盈百川我銘考官以昭
先歷十九世緒益延焯哉任恤德靡愆率
而雲仍亘千年

史景賢墓誌銘

君諱韋卿字景賢鄆史氏故國世臣太師
丞相保寧軍節度使越忠定王諱浩為曾
祖妣貝氏魏越國夫人太師中書令保寧

清容居一集卷三

九

昭信軍節度使衛忠獻王諱彌遠為祖妣
潘氏齊魯國夫人觀文殿學士正奉大夫
奉化郡公諱字之為考妣趙氏高平郡主
君幼成合矩度進退持奉侍立占對識者
知真王孫筆墨書史楚楚自將皆有法郡
公目送深念之稍長鉛采自陶寫蒼松斷
崖昂然有遺世意宮商敷宣綵鸞詠而鳳
幽鳴也退靜韜匿冥會于千載之上察其
念良是矣郡公職二品君當以京官入仕
生晚祿弗及至治三年秋八月得上氣疾

却藥賦詩出別語於宗親桷時官京師
呼桷子瓘立牀下曰為吾語而翁求銘以
昭吾志焉越翌日辛酉果卒嗚呼年甫四
十有八章綬積骸隱顯有定數至於年亦
不得永是可哀也已維忠定王桷外高祖
幼習外家獻文世德相業焯在宋史不敢
論獨叙三世壽考以增君之悲維忠定以
三公居東湖三十年陪祠慶壽秀骨山立
多士秉笏交語曰史太師真壽相年八十
有九即世忠獻獨相二宗二十有七年總

核庶政燭照數納罔有缺年七十以終郡
公恂退若癯儒厖眉素毫冰玉照焜鄉黨
年七十有九迺終壽種彰灼若是君才不
得一見施設年又不能以紹傳是大可哀
也已子一性孫女二將以某年某月葬鄞
縣陽堂鄉金輿之原銘曰

寥寥東陵瓜圃熟沈冥里閭企高躅達人
知命化不恧手持參差入雲谷周公魯公
儼初服奉著以占剝斯復學詩習禮在嗣
續我銘孔悲辭匪瀆佳城鬱蒼覘宰木

袁州知事孔君墓誌銘

大德初无孔君昭孫明遠甫為慶元儒學
正于時禮部尚書王先生應麟師表後進
門無雜賓明遠以通家子執疑證訛每
連席請益時則有教授某恣睢自負語侵
先生廼憤然曰吾不能與之共處疏其謬
誕十數事鳴于憲府人益竒其伉直有先
中丞遺風是後為蘄陽教授蘄陽舊為邊
障地君能化其俗使稍就學久之丕變為
儒士皇慶元年授慈溪縣主簿郡人咸曰

是斥故教授者飭躬以廉民莫敢病未幾
江浙省取為掾會歲侵計富人籍田出粟
以賑吏不能舞文粟悉入市其直輒減宰
輔竒之延祐二年授從仕郎袁州知事秩
滿泰定元年以疾卒時年六十有二君實
孔子五十二世孫中丞為太宗傳四十有
七世中奉公傳與其從子玠南徙三衢賜
廟譜諱章灼而君之考諱某咸淳間為名
太守後僉書樞密院事職進資政殿大學
士而大父某亦贈太子少師謚文介曾大

父諱某贈某官妣某氏某氏某氏俱贈郡
夫人噫士常患為世家紹宗趾嫩懼難以
繼仕顯矣德不稱無取也言足以斥姦發
揚剛毅是則於孔君見之仕雖不大振於
孔君何憾焉予嘗與君繇義烏同邸宿至
婺學旬日危坐論古今各欲以名節相勉
而懷竒抱介予輒讓不敢今歸老田里期
為全人思一見明遠不可得至是淇來請
銘安得勿哭也已娶王氏前進士集之女
男六淇淮繼兄後海蚤世消繼弟後建德

儒學正瀛慶元昌國州儒學正澣早夭女
二適山陰王壩富春張順可某年某月葬
葉水浮河原銘曰

金剛而水清行之成也白兮不緇德之貞
也憤世嫉阿全粹精也謝彼戚施實蜻蛉
也銘以揭之歸藏永寧也

僉事范君墓誌銘

大德六年范君子誠為平江路經歷于時
稍將之京師道具其郡大夫疑忌事多不
決范君抱牘堂上定可否大夫領領不復

有異議人皆曰是真贊畫才嗣後為掾中書

仁宗皇帝在東宮興崇禮文廣廟祭凡視執政者率增贊書桶時日具紙墨君排剔研討使各中繩式莫有訾議嗣爾厭繁劇告外補湖州推官又為黃巖州州與鄞相犬牙治跡賢否嘗耳接巷議州民來鄞必曰吾州黃氏子號豪民范侯能挫抑之帖首受罪後予直集賢黃巖之儒生暨商于城垆者咸告曰黃生易黃冠訴范侯以不

直遂議于大學士郭公訖不受其說精神籠絡貫穿于儒術法律將大展其用而其子景文踵門泣以告曰先君之不祿在泰定二年閏月某日得年七十道遠不克歸葬以是歲二月某日與大父奉議君俱葬于平江路長洲縣武丘鄉白蓮橋之北原知先君莫如子敢以銘請謹按君諱忠其先京兆藍田人後籍真定今三世矣其為仕首受史丞相之孫耀辟為浙東宣慰府掾改受蘭溪主簿再辟江浙行省掾迺授

平江路經歷又授揚州路經歷不赴改辟
都省掾授湖州路推官以選能為海道府
千戶分治四明知台州黃巖州

英宗皇帝詔風憲舉守令再知徽州婺源
改同知福建轉運鹽司事恭定元年擢僉
江南浙西道肅政廉訪司事其簿蘭溪嘗
攝尉事捕造偽楮當受賞君謝不取在湖
州有訟弟死非命且疑弟婦受賂焚其尸
君錄囚考弟實以鬪死婦始得脫湖多淫
祠毀三百六十以治官舍分漕四明首拓

廳事嚴竦治具新天妃宮以肅祠使其治
黃巖黃氏事最著正彝倫絕攘奪尸祝口
誦宜著于郡乘婺源俗尚競渡易其舟為
浮梁民不病涉在閩中鹽足收民而私貿
者悉絕考其所居官興建鋤擊為已任絕
功利守名實為君素志迄不展大用壽與
祿不失其願亦可無憾矣嘗鑄禮殿祭器
書二千卷歸于鄉學集賢王公仲常為文
以美薦于慈孝頌宗錄孤故贈禮部郎中
白公某壯歲深竒之妻以女君感知已凡

所為樂府粹刻以傳曾祖昂霄金大安元
年進士官正議大夫同知靜難軍節度使
兼邠州觀察使祖元泰 元授從仕郎同
知解州事父天祐汀州路經歷贈奉議大
夫真定路趙州知州驍騎尉元氏縣子景
文由臨安主簿辟江浙行省掾敏脩善吏
事其進將未艾孫二公琇公琰孫女五乃
為銘曰
吏詬于儒以儒為拘儒以病吏其刻莫渝
據會統宗孰承其傳温温范侯趾嫩紹先
化其竒觚不急以干削豪翦強欲援以手
謂不大逢亦既祿壽世方尚名我獨倚之
彼喜以功縮武避之武丘之原松柏峙植
竟無不之子孫承式

鄭照磨墓誌銘

鄭威敏公驤以靖康虜難死同州紹興錄
孤褒忠賜廟愍節至于其孫建德登進士
第延賞守祠世嗣不絕五世孫諱元貞實
奉祠事生孫曰端是生汝賢為江西安撫
司準遣生檜為都酒庫官君之父也君諱

文瑞字子祥生而骨相殊特府君深竒之
稍長從鄉先生課程文有能聲科舉既廢
居里閭以孝謹稱至元間下令舉儒吏實
預首選試郡功曹移典玉山郡俟復取自
近省授監平江路倉轉海道萬戶案牘官
再為海鹽州案牘轉行省鈔庫副使平江
庾氏歲入浩夥不得脫君獨以治辦稱海
鹽多豪民殺人率遣奴償死君能直之行
省積弊楮三年不毀君上言申其數而歲
除之後取以為法泰定元年勅授將仕郎

浙東道宣慰司照磨兼承發架閣予見君
于京師言議縝密剴割苛冗中綦節暨官
帥司下帷沈思吏跡不入戶勾稽研覈充
然益有餘地古之善居官者必自持家始
自衣冠丘墟不復給足荷戈負耒何可勝
道念昔信實要衝君獨善理其身掇拾化
治任能竭力相其天時權其羸竒卒昌於
官以發其素蘊是殆於君見之抑又聞之
流光演休首於死節宋社云亡忠義之錄
一二僅見則威敏之澤雖十世未艾君續

其承猗與盛哉其卒在恭定三年九月某
日年六十有三某月某日葬某縣某鄉子
男四謙亨復亨鼎亨泰亨女三嫁黃中正
孫良玘葉原道皆仕族孫男七孫女七娶
姚氏曾祖妣蘧氏祖妣劉氏妣謝氏謙亨
奉柩將歸里踵門泣以告曰先生故大門
知官譜唯詳而吾里獲銘者數家矧先子
世系若是敢以請銘曰

志專豐崇足昌其躬家傳於忠蹇事于公
美玉韞之良馬繫之不泄不辱去紹以續
作之怲怲承之競競而子而孫視我斯銘

文清薛處士墓誌銘

孔子叙逸民謂其求志達道超然於塵垢
之外心若槁木形若蟬蛻動莫有跡行莫
可名其混世也物莫與俱冥神內觀返真
潛虛若是者其近之矣故昔之善晦匿者
草衣菲食不導引以壽養其天年恣縱泉
石歷探遠挹興至而若遺擇幽絜以養其
雅操求於世吾不得而見之矣今得一人
焉曰處士薛君勉薛君信州貴溪故儒家

自其曾大父子徹以儒科縣南丹大父琢
父士亨繼業進士君益以儒自勵居鄉黨
教授名不蘄彰冲然有容守約自裕游湖
湘極交廣返築室于宜陽納幽據勝為堂
曰寶善以示子孫泰定三年四月某日卒
年六十有八族黨姻戚咸會哭曰先生儒
以紹傳茲其為文也宜矣固窮而無求貽
書以遺後其得不謂之清乎遂私謚之曰
文清子二玄義玄儀玄義與余為方外交
在崇真宮數評議吾徒所當為事詞章清

峭翰墨簡潔每視之嘗以為不可及君既
死求銘於余實不敢辭在易蠱之上九不
事王侯高尚其志而初爻則曰有子考無
咎嗟夫離世絕俗念不存於家非子承意
曷克臻濟是肥遯者猶相須以成也妣王
氏配孔氏孫男二女一以某月某日葬銘
曰

冥飛維鴻莫窮去還飄搖長裾游於海寰
沈匿不羈謝彼世艱貞簡峻清玉雪者顏
支離侶困爰養其遯先賢高風承耳接論

葆真藏名永裕嘉問振振有子益昌者名
三光盪摩服其粹精有大之松清風泠泠
非培曷成非繼孰承

海鹽州儒學教授來府君墓表

維來氏四明大族繇處州太守諱轂試開
封府第一登嘉祐四年進士第佐蘇文忠
守杭文忠為同年生後贈光祿大夫生倉
部郎中諱灼得罪政和以歸生贈朝奉諱
垞朝奉生通議大夫諱文通議生龍圖閣
學士贈少師諱燮嘗以禮部侍郎專史事

清容居一集卷二

七

謚正獻天下稱為絜齋先生桷七世祖諱
穀試開封以中書守當官遷祥符縣丞生
曾孫為少傅同知樞密院事諱韶贈太師
越國公受學正獻公於宗譜為族子相踵
登淳熙進士第同入秘書省為史官先後
為侍從縉紳榮之正獻生子四人俱至名
卿尚書東宮官而第三子最清顯嘉定七
年進士第一再世國子祭酒仕至兵部尚
書給事中實錄史院修撰諱甫贈少傅謚
正肅天下稱為蒙齋先生正肅次子諱俔

通判潭州是生君諱寧字德平以安定長
授海鹽州儒學教授未拜延祐七年六月
二十日卒年六十有一嗚呼甲族鼎貴莫
盛吾里薨棟接耀郡守丞監官議婚對未
肯齒擬華腴爭高姿度悅澤可愛念遇大
變故困辱不自完業無依歸質質以死者
多矣方至元十五六年間故家猶亡恙海
鹽時年二十柄年十四五私相議曰宦族
久當地宜蘄為傳遠計未幾正獻宅火留
城南遂各盡晝夜濬源鈎思探索幽隱以

黜陳辭為己任考閩蜀東浙永嘉湖南江
西之儒先合其異同不在於貴耳雜書叢
說輯言行者尊之吾與子所當辨更二十
年各宦游四方君以憂窘困躓酒酣語豪
卒不少貶折詩筆益溫雅簡潔察其學猶
以昔所言自任柄繇集賢罷歸往拜焉病
且瘠不能起忽手書曰夜夢游南嶽署已
判官遂釋之曰南正火也火為離為文明
宜司以瑞太平今
天子興文祿弗及其在乎子孫未旬日下

世夫子作春秋譏世卿史非世官不能兩
家子孫凡五為史官獨君不及用誠可憾
曾祖妣邊氏秦國夫人祖妣趙氏衛國夫
人妣趙氏封孺人子四曰霆曰杲曰銳曰
齋孫一人有文集若干卷葬在正肅塋十
步邇廼表于墓曰桷備史屬號最久見秉
筆者罔再傳獨東平王公其子文且賢纂
脩有能名嗚呼吾宗免矣夫君不得預為
可吁厥子若孫永紹圖至治二年歲次壬
戌族姪具官桷表

清容居士集卷三十一
王
真定安敬仲墓表

嗚呼金蹠宋踰南兩帝並立廢道德性命
之說以辯博長雄為詞章發揚稱述率皆
誕漫叢雜理偏而氣豪南北崇尚幾何所
分別當是時伊洛之學傳南劔至乾道淳
熙士知尊其說闡明之朱文公統宗據會
織鉅畢備正學始崇又未幾偽學造謗咸
諱其說以售仕于時金將亡各流離自保
烏覩所謂經說哉有明其說者獨江漢趙
氏私相筆錄尊聞傳信稍自異流俗

皇元平江南其書相載以來保定劉先生
因薦志獨行取文公書會粹而甄別之其
文精而深其識專以正蓋隆平之興使夫
道德同而風俗一承熄續絕不在於目接
耳受而有嗣也劉既死得其傳者曰安君
焉君諱熙字敬仲其學汪洋靜邃謂文以
載道辭不勝不足以言理故其言脩以立
於詩章幽而不傷慕貞絜之實將以自任
其道者也道散於異端九流證拾於墜簡
傳者益遠而書幸具在不知而作者則索

於句讀之末旨意斷絕踵謬而莫悟君設
對問以辨後作者悔而焚其書左氏浮誕
不合經者悉去之續皇極經世書繇元豐
至至大三年考家禮為祠堂以奉四世邑
人化之教人也持敬為本解經必毫縷以
析果知之必驗其所行弟子相從者常百
餘人出入閭巷佩矩帶規知其為君之弟
子其於劉先生也未嘗一見之蓋薦信其
書默求以通焉者也劉亦知君足以傳道
卒不得見焉君深悲之而於學有侶君無

憾矣君之先太原離石人五世祖玠仕於
金曾祖昇不仕祖滔以經童登第金將亡
徙真定因居焉戊戌歲詞賦入等占儒籍
考松江東宣慰司照磨妣劉氏君少敏悟
諸父咸噐之素多疾嘗避隱封龍山然卒
不得年至大四年五月某日卒年四十有
二娶張氏焦氏子二墜垣女一嫁保定等
路鷹坊總管王冲是歲葬藁城縣安仁鄉
先塋之側其卒也翰林學士王公思廉以
書唁其父曰自敬仲死詎安氏不幸士林

不幸矣有遺文若干卷既葬之十三年門
人蘇天爵述其事狀踵門曰默齋先生天
爵從學寔有年先生之德之行願表于墓
原使有考稱作而言曰真文忠公德秀與
朱文公同里生不及事焉文公之學真實
紹之侑食于廟于祠無異辭集賢劉公生
愈後闡揚合一劉公功與真公並安君不
得見劉公而道寔有傳盛矣哉春陵之學
四方為有準矣某年某月某日具官袁桷
表

史猷父葬記 代其子作

大德丙午九月朔我先君子壽春推官卒于寢年七十有三越十月丙午葬其地邇高祖越忠定王墓次百步許先夫人郭氏卒葬十五年廼合窆焉嗚呼先君子諱徽孫字猷父少孤祖母嚴氏躬教習具諷先訓感悟于時史氏極貴盛壽春癯然整脩奮棄子弟玩習搜紹淵懿族祖文靖公見之曰兒當以文名吾門稍長試吏為諸暨主簿從政精覈邑長缺使者俾治幾一歲

清容居一集卷二

古

入辟淮東治田事調揚州司理叅軍帥大器重悉以事付甫授壽春帥益取自佐循承直郎而先君子不復仕三十有三年矣有詩文若干卷晚讀陶靖節詩語近意遠視世德昭合深自慕儼平居無愠忤色筆墨清藝觴至輒就放邵子觀物為詩數十篇久更困約益以理自得清日危坐道舊事緩語不絕口鄉黨賴焉嗚呼公亘等五男子為從伯父從叔父後者曰公玉公暮次公晝公亘女三已嫁仕族浙西提點刑

獄贈少師諱彌正為曾祖紹興監酒贈朝奉大夫諱實之為祖朝請大夫通判處州諱顯卿為父將葬謹書納諸壙

張府君墓田記

平章留守亞安公介其掾韓叔亨致命於棗桷曰吾外大父張府君世燕大姓貞祐來兵革相尋獨府君逃難脫死每言避兵本末輒吁歎涕泗且曰吾譜牒亡缺使果得仕吾安能為祖父榮顯耶繇是益治生自裕強之仕弗願也至元十五年三月某

日卒年六十有七外大母劉氏次黃氏俱無子一女劉出也嫁我先公中奉大夫湖南宣慰使後以卹典贈金紫光祿大夫大司徒梁國公而吾母亦得封為梁國太夫人府君之塋在大興路大興縣宜泉里歲時率外孫奠薦于塋下封植崇謹顧瞻咨嗟推其所自出其接于見聞者誠莫有怠也更數十年則曰禮有隆殺焉推服盡之義至於異姓則必曰先王制禮不可過也夫禮繇情生使張氏有後焉誠不敢越吾

懼其瑩域之蕪沒詔于曾玄將有以謹諸
為我記之桷聞諸春秋會盟稱辭甥舅之
國雖數十世猶徼福於先君敦叙之義蓋
可考也掩骼埋胔先王之令典留守公之
用心合於禮者之為也凱風寒泉藹然見
於悽愴情之至也然則凡為子孫者寧不
守其家訓也哉府君諱祥字瑞之壻梁公
諱某外孫長即榮祿大夫平章政事大都
留守領少府監行工部事佩金虎符武衛
親軍都指揮使兼大都屯田事次某承務
郎太府監左藏庫使次某奉議大夫太僕
寺丞外曾孫凡若干人延祐四年九月某
日具官桷記

田氏先塋誌

太僕田茂實君秀與桷交 京師相好也
大德乙巳三月某日其先君子諱某年六
十有五卒于河南君秀墨色蓬首哀不絕
道兼晝夜行歸治其喪將窆于大塋卜以
不吉告越二年始得吉于邱山之白李莊
廼徙武略君與夫人齊氏合葬以諱某君

祔至大戊申君秀奉家譜言曰嗚呼先君子德豐而養薄孤之罪也田氏世居豐州有試金武舉科為環州司候者諱青金徙汴拜武略將軍總戎千夫屯鄧州鄧歸有元改為襄樊屯田官豐州墓夷徙始占籍于洛陽武略吾大父也先君子嘗言金將亡城郭蟻潰四出馬塵南驅躡藉爭死枯骼野燐千里一色豐州為路衝荒墟敗礫白日無人行聲自吾少年聞祖父言每震掉不自已今汝生盛明時重和累休振

纓清朝吾老於斯土藝于田漁于河涵煦濡濟食安閔華沒齒誠樂也仕何慕焉茂實泣受其言而書之敢以為邛山之瑩誌請稱曰噫夫邛山古之幽宅也穹隆袤廣可以數度自秦漢而降錮其封崇極于夸貴俠侈之士不知其幾後今變更高者為雲煙下者為水泉而慎終送死日相尋於此山愈完而愈新者何也夫貴以日計德以世計德足而貴不至者命也恃貴而忘德貴將耻之今君秀官于朝將貴矣念先

君子之言警其宴安彌以自勵吾知田氏之墓湔然而豐葺必戒必護衍其子孫益守孝謹雖千百年無變而始田氏之譜者由武略愈遠而愈可考者由太僕其尚勉之哉母夫人高氏慈儉有家則君秀今為奉直大夫太僕院判第二德峻世英葬以某月某日袁楠誌

高夫人葬記代作

嗚呼我先考至元甲申歲七月十有三日不祿昉時年二十有一平居嘗言吾宗世

清容居三集卷三十一

元

居遼陽始祖當金時以征遼功封太師有子十人皆拜節度使金亡太師子悉散軼獨魯祖寄嵐州節度紹其宗是生大父諱植為洛州防禦使妣大氏夫人洛州生近侍局副使諱世榮副使卒吾時年八歲妣王氏夫人寓殯于陝因家焉夫人鞠撫之迄見其成人初娶郭氏前元帥左監軍巨濟之女後來大名經歷孫用之無子察吾氣宇非凡近遂以汝母歸于我因定居大名而自洛州而下藁殯于陝者皆葬于元

城縣之令公鄉焉先考諱昂字冲霄繇轉
運幕職拜朝城武陟縣尉能以慈惠撫其
民盜不敢犯後謝病退居樹德自秘重享
年五十有九以終昉初掾集賢由院上中
書自中書累遷為左司郎中出為潭州路
總管太夫人視聽明徹總覈靡密昉盡服
王事一不使亂其志意未幾入為中政院
同知拜中書省參知政事尚書省立後除
江浙省參知政事至大四年詔官二品
得贈二代繇是副使得追贈嘉議大夫大

名路總管兼府尹上輕車都尉王夫人追
封渤海郡夫人先考贈中奉大夫參知政
事護軍渤海郡公夫人封渤海郡太夫人
皇慶癸丑昉陞資善大夫為江浙行中書
省左丞太夫人年益高屢疏終養延祐元
年春復召為中書省參知政事奉夫人將
北歸使者屢趣就道又未幾改拜集賢學
士商議中書省事廼不敢辭遂侍夫人來
京師是歲十月十日以疾終于正寢享年
七十有九嗚呼昉不孝先公亡恙時不能

以祿為一日之養幸得奉先夫人以自慰
垂三十年不自殞滅禍惟慈親攀號訴慕
實無所容罪將以是年十有一月某日葬
于先塋日薄未得謁銘于當代謹志其梗
槩納諸壙男一昉女五人長適梁從晦大
名等處管民提舉次適李允中萬盈屯丞
二人蚤卒次適李好義承務郎齊河縣尹
孫男三人筠孫壽孫和尚孫女一人孤子
昉泣血謹誌

趙令人葬記

代作

清容居二集卷三

三十一

嗚呼宰孫大父為郎時先子樂清尹始試
吏部靜秀專恪鄞史氏號相家刑部再世
國子生執禮秉度不以官簿矜許先夫人
侍永陽王族屬崇近莫敢議昏對永陽尊
刑部愛樂清遂以歸乃受封令人而始嬪
焉夫人姓趙氏諱益柔曾祖師意追爵於
吳謚宣獻祖希邈掌宗正食于會稽夫人
冲默謹視聽儀範不出屏閤相先子以和
撫子若女無二意距先子葬始一紀夫人
以歿歿時年五十有四嗚呼養不能盡哀

未知稱乃大德丙午合封于樂清之兆而
先夫人之亡適終喪矣痛徹于天彙事微
德將不懈有俟永陽諱與某夫人為長女
刑部諱能之夫人為冢婦先子諱普卿宰
孫為孤子女一嫁趙孟貫是歲十月甲辰
葬謹濡血為之記

清容居士集卷第三十



